

Date – 27/10/2025

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Mizo Zirlai Pawl MZP chuan kum 90 a tling a, vawiin hian a lawmna ni pah fawmin Zirlaite Ni an hmang ang.
2. Chief Minister Pu Lalduhoman Mizoram chu Lakshadweep dawta eirukna tlemna berna state a nih thu leh hei hi thil chhinchhiah tlak leh chhuanawm tak a nih thu a sawi.
3. Prime Minister Narendra Modia chuan ASEAN nena an thawhdunna Comprehensive Strategic Partnership chu khawvela remna leh hmasawna atan a pawimawh chho hle a ni a ti.
4. President Droupadi Murmu chuan private sector healthcare institution te chu ram hrisel leh ram changkanga India siam kawngah an thawhhlawk thei hle tih a sawi

<><><>

STUDENT AID FUND

Mizo Zirlai Pawl MZP chuan kum 90 a tling a, vawiin hian a lawmna ni pah fawmin Zirlaite Ni an hmang dawn a ni.

Aizawla I & PR Auditorium ah vawiin chhun dar 12 ah inkhawm an buatsaih dawn a, zirlai hruaitu lo ni tawh te chawimawina hun an hmang ang.

Akashvani Aizawl-in a kawmna-ah MZP President Dr C. Lalremruata chuan tuna an term tharah hmachhawp lian tak, zirlai harsa te harsatna sutkianna tur Student Aid Fund chu a dan an duan mek thu a sawi a. He sum tlingkhawm hi zirlai harsa, hostel fee leh thlatin fee nei lote pawhin an hman theih tur a nih dawn thu a sawi a. Fee pek theih loh avanga school hrang hranga exam phal loh te a thlen thin thu sawiin marksheet pekchhuah lohte pawh a awm thin thu a sawi a. Heng zirlai harsa te tanpuina tur hian Student Aid Fund hi an siam dawn tih a sawi a ni.

Pu C. Lalremruata chuan central service-a Mizo thalaite an tlin theih loh chhan an zirchianna-ah midangte el pha tur syllabus tha zawk neih a tul tih an hmuhchhuah thu leh hemi atan hian hma an lak dawn thu a sawi a. Hmundanga lehkha zirte'n an zirchhuah veleha hna an hmuh theihna tur awlsam, placement te buatsaih sak thin an nih thu a sawi a. Hetiang hi Mizoramah a la awm loh avangin college emaw master degree emaw zirlaite'n an zir chhuah ve leha hna an hmuh theihna turin placement agency te chahchhuaka hma lak an tum thu a sawi a. Career awareness chi thar tha zawk zirlaite pek an tum thu leh fellowship hrang hrang tha tak tak zirlaiten an la hriat tam loh leh dil nachang an hriat loh a tam thei ang ber zirtir an tum thu a sawi a ni.

<><><>

MZP

MZP General Secretary Pu C. Lalhmingsanga chuan ILP chungchangah leh dan dik loa sponsortute lakah na taka hma lak an tum thu a sawi.

Akashvani-in a kawmnaah he thu hi sawiin Pu C. Lalhmingsanga chuan hmanni lawka International Star Expo, Lammuala huaihawtah mi 36 lai ILP felfai lo Mizoram rawn lut tlang an awm thu a sawi a. Hengah hian ILP phawrh tur nei miah lo mi 3 leh temporary ILP felfai lo 30 chuang an awm thu a sawi a. Heng hnamdang dan loa awm te thurualpui duh tu Mizoram mi leh sa pawh an lo puanzar tawh thu sawiin Mizoram sorkarin rang taka hma a lak avanga an lawm thu a sawi a. Hetiang hi thleng nawn tawh lo se an duh thu a sawi a ni.

MZP General Secretary chuan Sairanga rel lo lut mek pawh an lo enfiah tawhnaah a security leh ILP pekchhuah danah pawh thil tam tak an hmuhchhuah tawh thu leh an lo puanzar tawh thu a sawi a. ILP chungchangah nasa taka hma lak an tum thu sawiin dan loa lo lut te chu thawn haw zel an nihna tur leh dan loa sponsor tute pawh dapchhuaha na taka hrem an nih theihna tur hmalak zel chu an tum lian ber te zinga mi a nih thu a sawi a ni.

MZP hruaitute kawmna hi vawiin chawhma dar 10:30 ah hian Akashvani Aizawlah tihchhuah a ni ang.

<><><>

MTDA

Gauhati High Court chuan Kawnpui leh Sairang inkar national highway 306 siamtu NHIDCL hnuaia contractor J. Infratech chu an hna-thawh chin leh kawng an siam zawh theih hun tur October ni 31 ral hma a affidavit hmanga thehlut turin a hriattir.

Kawnpui leh Khamrang inkar National Highway-306 kawngpui chhia chungchangah hian Mizoram Truck Drivers' Association (MTDA) chuan Gauhati High Court Aizawl Bench-ah public interest litigation (PIL) an thehlut a, chu chu judge pahnih thutna High Court bench chuan Zirtawpni khan a ngaihtuah a ni a. MTDA khinna chungchang-ah hian Gauhati High Court chuan NH-306 enkawltu NHIDCL-in kawng siam tura hna a pek J. Infratech chu thubuaiah hian a hnuk lut (implead) a. Hna an thawh tawh chin leh kawng an siam zawh theih hun tur October ni 31 hma ngeiin Court-ah affidavit hmanga thehlut ngei turin a hriattir a ni.

J. Infratech hian sawifiahna affidavit an theluh loh chuan Court-ah NHIDCL hotute an inlan a tul thu a tarlang a; thubuai ngaihtuah leh hun atan kar leh Zirtawpni, November ni 6 a ruat bawk a ni.

Gauhati High Court-a Justice Marly Vankung a Justice Kaushik Goswami te thutna bench chuan July ni 18 khan MTDA aiawha Pu Jordan Rohmingthanga PIL theluh chu a lo pawm tawh a. MTDA hian National Highway-306 leh 06 kawng chhe lutuk chungchangah hian Ministry of Road Transport & Highways, NHIDCL, Mizoram sorkar leh PWD te a khing a. He lai kawngpui hi Mizoram chaklakna ber a nih thu leh truck khalhtute chu

kawng chhe tuartu ber an nih thu an tarlang a ni. Mizoram mipui mamawh chawh luhna ber kawngpui chhe lutuk chu Mizoram pumin an tawrh thu an tarlang bawh a ni.



VIGILANCE WEEK

Chief Minister Pu Lalduhoman Mizoram chu Lakshadweep dawta eirukna tlemna berna state a nih thu leh hei hi thil chhinchhiah tlak leh chhuanawm tak a nih thu a sawi.

Vawiin Thawhtanni atanga Pathianni thlenga hman tur Vigilance Week, 2025 puala a thuchahah he thu hi sawiin Chief Minister chuan Vigilance Week chu kumtin Sardar Vallabhbhai Patel-a piancham, October ni 31 huamchhunga hman thin a nih thu a sawi a. Hrui khat vuana eirukna leh hlemhletna do tura mipuite zirtir na’na hman thin a nih thu a sawi a. Mizoram sorkar Vigilance department pawhin kum 2018 atangin kumtin he hapta hi a hman thin thu a sawi a. Chief Minister chuan eirukna chu hmasawna daltu, mipuiten an chanvo dik an chan theihlohna bul, Pathian huat zawng a nih thu a sawi a. Mahni chhungkua theuhah eirukna do hna huai taka kalpui tur leh eirukna sum atanga lei thil reng reng duh lo ngam turin mipuite a sawm a ni.

Pu Lalduhoma chuan eirukna laka fihlim theihna turin sorkar laipuiin Prevention of Corruption Act, 1988 a siam thu leh sorkar hnathawkte chu CSS Conduct Rules, 1964 danin a phuar thu a sawi a. Prevention of Corruption Act, 1988 hnuai-ah Anti Corruption Bureau (ACB) leh Mizoram Lokayukta din a ni tawh tih sawiin kumin chhungin eirukna leh a kaihhnawih thilah ACB chu preliminary inquiry tih phalna 10 pek a nih tawh thu leh regular case siam phalna 5 pek an nih tawh thu a sawi a. Transparency International in Corruption hluar lam tehna Corruption Perception Index, 2024 ah India chu ram 180 zingah 96 naah a dah thu leh kum 2023 aiin pathumin hma a sawn thu a sawi a. Transparency International leh NITI Aayog data behchhana CMS India Corruption Study in a hmuhchhuah danin Mizoram chu Lakshadweep dawta eirukna tlemna ber state a nih thu leh thil chhinchhiah tlak leh chhuanawm tak a nih thu a sawi ni.



GST 2.0

Sorkar laipuiin GST rate thar a duanah damdawi man bakah damlote mamawh hmanraw hrang hrang man nasa takin a tlahniam.

Mizorama damdawi leh a kaihhnawih hmanraw zuartu Genesis Enterprise te chuan Akashvani Aizawl zawhna chhangin damdawi man leh damlo enkawlina hmanraw hrang hrangah a tam zawkah chuan khawl thenkhat GST rate zaa 18 ni thin leh damdawi zaa 12 ni thin chu zaa 5-ah a tlakhniam vek thu an sawi a. Eng emaw bik te, rate hlui la ring tlang a awm na a, a tam zawk chu a tlawm nghal vek thu an sawi a ni.

Damdawi leh a kaihhnawih hmanraw man tlahniam chu damdawi zuar chhawng tute tan pawh a hlawk thu sawiin a hlawkpui ber tur chu a leitu mipuite an nih thu Genesis Enterprise neitute chuan an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.
<><><>

PM

Prime Minister Narendra Modia chuan ASEAN nena an thawhdunna Comprehensive Strategic Partnership chu khawvela remna leh hmasawwna atan a pawimawh chho hle a ni a ti. ASEAN-India Summit vawi 22-na, Malysia-a Kuala Lumpur-a neih mekah internet kaltlanga he thu hi sawiin Pu Modia chuan tunlai khawvel dinhmun dethawng takah hian an thawhdunna chuan nasa takin hma a sawn a ti a. Kum zabi 21 na chu India leh ASEAN ramte kutah a awm tih a sawi bawk a ni. He hunah hian PM Modia chuan kum 2026 chu "ASEAN-India Year of Maritime Cooperation' ah a puang pawk a ni.

ASEAN-India Summt ah hain External Affairs Minster Dr.S.Jaishankar pawh telin khawvel ram hruaitu pawimawh taktakte nen an inkawm a. Heng zingah hian Malaysia Prime Minister Anwar Ibrahim te, Thailand, South Korea leh Singapore Foreign Minister te pawh an tel a ni.

PRESIDENT

President Droupadi Murmu chuan private sector healthcare institution te chu ram hrisel leh ram changkanga India siam kawngah an thawhhlawk thei hle tih a sawi. Ggaziabhad-a Yashoda Medicity a hawwnaah he thu hi sawiin President Murmu-i chuan helama mawhphurtu zawng zawngte chu mite tana inenkawl na tha pek kawngah tun aia zau zawka hmala turin a sawm a. Khua leh tuiten damlo inenkawl na tha an neih theih na tura theihtawp chhuah turin a sawm a ni.

<><><>